

Doakan Muhammad Fateh, pesakit Covid-19 termuda

Malaysiakini

26 Mac 2020

N Faizal Ghazali

Muhammad Fateh Aqil Mohd Nazmee, kanak-kanak berumur dua tahun empat bulan yang menghidap leukemia kini terpaksa pula 'bertarung' dengan Covid-19 setelah disahkan dijangkiti virus itu.

Perkara itu didedahkan oleh Persatuan Sokongan Anak-anak Kanser (Pesona) melalui satu hantaran di Facebook, semalam.

"Mohon doakan anakanda Muhammad Fateh Aqil bin Mohd Nazmee, 2 tahun 4 bulan yang disahkan positif virus Covid-19.

"Fateh, penghidap kanser darah leukemia, sepatutnya menjalani kitaran kimoterapinya mengikut jadual di Hospital Universiti Sains Malaysia (HUSM) Kubang Kerian, namun ujian darah yang dilakukan mendapati dia dijangkiti Covid-19.

"Mohon didoakan agar anakanda Fateh sembuh dan dapat meneruskan perjuangannya," kata Pesona.

Terdahulu hantaran tersebut tular di media sosial dengan perkongsian hampir 1,000 kali selepas dimuat naik di Facebook.

Sementara itu sumber Kementerian Kesihatan Malaysia (KKM) mengesahkan perkara itu kepada Malaysiakini, hari ini.

"Ya, mangsa kini sedang dirawat di Hospital Raja Perempuan Zainab II (HRPZ II), Kota Bharu. Dia dijangkiti (Covid-19) melalui keluarga," kata sumber yang enggan namanya disiarkan.

Difahamkan Muhammad Fateh antara mangsa termuda yang dijangkiti Covid-19 di Malaysia setakat ini.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/516898>